

**სსიპ - საქართველოს ტექნიკური უნივერსიტეტის
სტუდენტური სერვისების, კულტურისა და სპორტის დეპარტამენტის
დებულება**

მუხლი 1. ზოგადი დებულებები

- 1.1. სსიპ - „საქართველოს ტექნიკური უნივერსიტეტის“ (შემდგომში – უნივერსიტეტი) სტუდენტური სერვისების, კულტურისა და სპორტის დეპარტამენტი (შემდგომში - დეპარტამენტი) წარმოადგენს უნივერსიტეტის სტრუქტურულ ერთეულს, რომელიც თავის საქმიანობას წარმართავს საქართველოს კონსტიტუციის, „უმაღლესი განათლების შესახებ“ საქართველოს კანონის, სსიპ - „საქართველოს ტექნიკური უნივერსიტეტის“ წესდებით, წინამდებარე დებულებით და საქართველოს მოქმედი კანონმდებლობის შესაბამისად.
- 1.2. წინამდებარე დებულება განსაზღვრავს დეპარტამენტის საქმიანობის საფუძვლებს, მიზნებს, ამოცანებს, ფუნქციებს და უფლება-მოვალეობებს;
- 1.3. დეპარტამენტიანგარიშვალდებულია უნივერსიტეტის რექტორისა და ადმინისტრაციის უფროსის (კანცლერი) წინაშე, რომლებიც ახორციელებენ დეპარტამენტის საქმიანობაზე სამსახურებრივ ზედამხედველობას კანონმდებლობით დადგენილი წესით.

მუხლი 2. დეპარტამენტის მიზნები და ამოცანები

2.1. დეპარტამენტის მიზნებია:

- ა) კულტურის, ხელოვნების, ჯანსაღი ცხოვრებისა და სპორტის პოპულარიზაცია საუნივერსიტეტო სივრცეში და ამ მიზნით არსებული ინფრასტრუქტურის მაქსიმალურად ეფექტურად გამოყენება;
- ბ) უნივერსიტეტში არსებული ინფრასტრუქტურის განვითარებაზე ზრუნვა სტუდენტებისა და აკადემიური პერსონალისთვის მათი ინტერესების შესაბამისი გარემოს და კომფორტული პირობების შესაქმნელად;
- გ) სტუდენტთა განვითარებისა და წინსვლისთვის ურთიერთობების დამყარება და აქტიური თანამშრომლობა, როგორც საქართველოს, ასევე საზღვარგარეთის ქვეყნების უნივერსიტეტებთან, სახელმწიფო და კერძო ორგანიზაციებთან;
- დ) სტუდენტებს, ადმინისტრაციის თანამშრომლებს, პროფესორ-მასწავლებლებს, მკვლევარებს და დეპარტამენტის თანამშრომლებს შორის ურთიერთობების გაღრმავება;
- ე) სტუდენტური ინიციატივების მხარდაჭერა, ზრუნვა სტუდენტების განვითარებაზე და მათ კარიერულ წინსვლაზე;
- ვ) საკუთარი საქმიანობით უნივერსიტეტის, როგორც სტუდენტების წინსვლასა და განვითარებაზე მზრუნველი სასწავლო დაწესებულების ავტორიტეტის ამაღლება;
- ზ) უნივერსიტეტის სტუდენტებისა და კურსდამთავრებულთათვის კარიერული წინსვლის ხელშეწყობის მიზნით კერძო და სახელმწიფო სექტორთან თანამშრომლობის გაძლიერება;

- თ) საგანმანათლებლო პროგრამების შემუშავებასა და განხორციელებაში პოტენციური დამსაქმებლების ჩართულობაზე ზრუნვა;
- ი) უნივერსიტეტის სტუდენტებთან და კურსდამთავრებულებთან მჭიდრო ურთიერთობა;
- კ) კურსდამთავრებულების ბაზის შექმნა/მართვა, ასევე კურსდამთავრებულებთან კავშირის შენარჩუნება და ურთიერთობის გამყარება;
- ლ) პოტენციური დამსაქმებლების ბაზის შექმნა და მათთან ურთიერთობა;
- მ) უნივერსიტეტის სტუდენტების გაცვლითი პროექტებისა და საზაფხულო პრაქტიკების ორგანიზება;
- ნ) აქტიურად თანამშრომლობა პროფესორ-მასწავლებლებთან, უნივერსიტეტის სამეცნიერო წრებთან, შესაბამისი რეკომენდაციების, წინადადებების მიწოდება;
- ო) საერთაშორისო საგანმანათლებლო და სამეცნიერო პროექტებში უნივერსიტეტის სტუდენტების ჩართვის ხელშეწყობა;
- პ) საერთაშორისო ფონდებისა და ორგანიზაციების სხვადასხვა საგრანტო პროგრამების შესახებ ინფორმაციის მიწოდება უნივერსიტეტის სტუდენტებისათვის და კომპეტენციის ფარგლებში კონსულტაციის გაწევა;
- ჟ) სტუდენტური კლუბების საქმიანობების ხელშეწყობა და წახალისება;
- რ) სტუდენტებისათვის გუნდური მუშაობის ხელშეწყობა;
- ს) მონაწილეობის მიღება სტუდენტური ფორუმების ორგანიზებაში;
- ტ) სტუდენტების მიერ ინიცირებული პროექტების განხილვა და დაფინანსების მოძიება;
- უ) მონაწილეობის მიღება სტუდენტების საზაფხულო და ზამთრის სკოლების ორგანიზებაში;
- ფ) სტუდენტებთან და სტუდენტურ ორგანიზაციებთან თანამშრომლობა, სტუდენტური პროექტებისა და ინიციატივების ხელშეწყობა;
- ქ) კომპეტენციის ფარგლებში უნივერსიტეტის სამართლებრივი აქტებით განსაზღვრული სხვა უფლებამოსილებების განხორციელება.

2.2. დეპარტამენტის ამოცანებია:

- ა) უნივერსიტეტის საქმიანობის სისტემატიური და მრავალმხრივი გაშუქება საუნივერსიტეტო ტელევიზიით სტუდენტების უშუალო მონაწილეობითა და ჩართულობით;
- ბ) სტუდენტებისა და აკადემიური პერსონალის ყველა ინიციატივის და განვითარებაზე ორიენტირებული პროექტის მხარდაჭერა და განხორციელება საკუთარი კომპეტენციის ფარგლებში;
- გ) კულტურული და სპორტული ღონისძიებების მომზადება და ჩატარება მაქსიმალურად დიდი რაოდენობის სტუდენტების ჩართულობით;
- დ) სპორტის, როგორც სტუდენტებისთვის ყოველდღიური მოთხოვნილების ჩამოყალიბებაზე ზრუნვა;
- ე) დეპარტამენტის საქმიანობისთვის აუცილებელი ინფრასტრუქტურის ზედამხედველობა, განვითარება და მისი გამართული ფუნქციონირების უზრუნველყოფა;
- ვ) სტუდენტთა ინტერესების გათვალისწინებით სპეციალური მასტერ-კლასების ორგანიზება და ამ მიზნით, როგორც ქართველი, ასევე უცხოელი პროფესიონალების მოწვევა;

- ზ) სტუდენტებისთვის დამატებითი პროფესიული კურსების ორგანიზება შესაბამისი ავტორიტეტული ორგანიზაციების ჩართულობით;
- თ) საქმიანობის სრულყოფა და ახალი მეთოდების დანერგვა თანამედროვე ინფორმაციული ტექნოლოგიების გამოყენებით.

მუხლი 3. დეპარტამენტის სტრუქტურა და თანამშრომლები

- 3.1. დეპარტამენტს ხელმძღვანელობს უფროსი, რომელსაც თანამდებობაზე ნიშნავს და თანამდებობიდან ათავისუფლებს რექტორი.
- 3.2. დეპარტამენტის უფროსი ანგარიშვალდებულია უნივერსიტეტის რექტორის და ადმინისტრაციის ხელმძღვანელის (კანცლერი) წინაშე.
- 3.3. დეპარტამენტის საშტატო რიცხოვნობა განისაზღვრება უნივერსიტეტის წარმომადგენლობითი საბჭოს (სენატის) მიერ დამტკიცებული სტრუქტურის და საშტატო ნუსხის შესაბამისად.
- 3.4. დეპარტამენტის უფროსს ჰყავს მოადგილე, რომელსაც დეპარტამენტის უფროსის წარდგინებით თანამდებობაზე ნიშნავს და ათავისუფლებს რექტორი.
- 3.5. დეპარტამენტის სტრუქტურული ერთეულებია:
 - ა) კულტურის განყოფილება;
 - ბ) სპორტის განყოფილება;
 - გ) სხვადასხვა მიმართულების მუსიკალური ანსამბლები და შემოქმედებითი ჯგუფები, სპორტის სხვადასხვა სახეობათა გუნდები და კლუბები.
- 3.6. დეპარტამენტის სტრუქტურული ერთეულების ხელმძღვანელებს და თანამშრომლებს დეპარტამენტის უფროსის წარდგინებით თანამდებობაზე ნიშნავს და თანამდებობიდან ათავისუფლებს უნივერსიტეტის რექტორი.
- 3.7. დეპარტამენტის სტრუქტურული ერთეულების ფუნქციები და თანამშრომელთა უფლება-მოვალეობები განისაზღვრება ამ დებულებით, უნივერსიტეტის შიდა სამართლებრივი აქტებით და საქართველოს მოქმედი კანონმდებლობით.
- 3.8. დეპარტამენტის უფროსის არყოფნის შემთხვევაში მის მოვალეობას ასრულებს მისი მოადგილე ან უნივერსიტეტის რექტორის ბრძანების საფუძველზე განსაზღვრული პირი ხელფასის სათანადო სხვაობის ანაზღაურებით.

მუხლი 4. დეპარტამენტის თანამშრომელთა უფლება-მოვალეობები

4.1. დეპარტამენტის უფროსი:

- ა) ხელმძღვანელობს და წარმართავს დეპარტამენტის საქმიანობას;
- ბ) პასუხისმგებელია დეპარტამენტზე დაკისრებული ფუნქციებისა და ამოცანების შესრულებაზე;
- გ) ანაწილებს თანამშრომლებს შორის ფუნქციებს და აკონტროლებს მათ საქმიანობას;
- დ) შეიმუშავებს დეპარტამენტის საქმიანობისა და განვითარების სტრატეგიას;

- ე) უზრუნველყოფს ურთიერთობების დამყარებას და აქტიურ თანამშრომლობას, სახელმწიფო და კერძო ორგანიზაციებთან სტუდენტთა განვითარებისა და კარიერული წინსვლის მიზნით, როგორც საქართველოს, ასევე საზღვარგარეთის ქვეყნების უნივერსიტეტებთან;
- ვ) უზრუნველყოფს ურთიერთობების დამყარებას და აქტიური თანამშრომლობას, საქართველოს და საზღვარგარეთის ქვეყნების სხვა უმაღლესი სასწავლებლების შემოქმედებით ჯგუფებთან, მუსიკისა და ხელოვნების წრის წარმომადგენლებთან და სპორტის სხვადასხვა სახეობის ასოციაციებთან;
- ზ) წარუდგენს უნივერსიტეტის ხელმძღვანელობას წინადადებებს დეპარტამენტის სტრუქტურისა და სამტატო განრიგის სრულყოფის მიზნით;
- თ) პასუხისმგებელია მის დაქვემდებარებაში მყოფი თანამშრომლების შეფასებაზე, წახალისებაზე, განვითარებაზე, მოტივაციაზე, დისციპლინარული ღონისძიებების ინიცირებაზე;
- ი) წარადგენს შუამდგომლობას რექტორთან იმ სახსრების, მოწყობილობებისა და ინვენტარის გამოყოფის თაობაზე, რომლებიც საჭიროა დეპარტამენტის მიზნებისა და ამოცანების შესასრულებლად;
- კ) ახორციელებს უნივერსიტეტის სამართლებრივი აქტებით განსაზღვრულ სხვა უფლებამოსილებებს.

4.2. დეპარტამენტის უფროსის მოადგილე:

- ა) თავისი კომპეტენციის ფარგლებში მონაწილეობს დეპარტამენტის მიერ შესასრულებელი ამოცანების პრიორიტეტიზაციაში;
- ბ) აკონტროლებს და ხელს უწყობს დეპარტამენტისათვის დასახული ამოცანების მიღწევის პროცესს;
- გ) საჭიროებისამებრ, წარმართავს მაღალი დონის კომუნიკაციას, მოსამზადებელ შეხვედრებს, მოლაპარაკებებს სხვადასხვა ორგანიზაციებთან უშუალო უფროსის დავალებით/მითითებით ან/და შესაბამისი სამართლებრივი აქტით მისთვის მინიჭებული უფლებამოსილების ფარგლებში;
- დ) დეპარტამენტის თანამშრომლებს აძლევს რჩევებსა და რეკომენდაციებს მუშაობის ხარისხის გაუმჯობესებისა და განვითარების მიზნით;
- ე) მონაწილეობს ან თავად უწევს ორგანიზებას და კონტროლს დეპარტამენტის შესაბამისი სტრუქტურული ერთეულის საქმიანობას, არეგულირებს და წყვეტს პროფესიულ და ორგანიზაციულ პრობლემებს, რომლებსაც განსაკუთრებული მნიშვნელობა აქვს დეპარტამენტის ეფექტური მუშაობისთვის;
- ვ) ხელს უწყობს დეპარტამენტის უფროსს მისთვის განსაზღვრული ფუნქცია-მოვალეობების განხორციელების პროცესში, ასრულებს დეპარტამენტის უფროსის მოვალეობებს მისი არყოფნის, ან მოვალეობის განხორციელების შეუძლებლობის შემთხვევაში.
- ზ) დეპარტამენტის უფროსის დავალებით ასრულებს სხვა ფუნქციებს.

4.3. განყოფილების უფროსი:

- ა) ორგანიზებას უწევს განყოფილების წინამდებარე დებულებით გათვალისწინებული ფუნქციების შესასრულებლად საჭირო ღონისძიებებს და პასუხისმგებელია მათ შესრულებაზე;

- ბ) ახორციელებს განყოფილების თანამშრომელთა მიერ მათზე დაკისრებული მოვალეობების შესრულებაზე ზედამხედველობას;
- გ) განყოფილების კომპეტენციის ფარგლებში ამზადებს და წარადგენს სხვადასხვა ხასიათის ინიციატივებს, შესაბამისი დასაბუთებით;
- დ) კომუნიკაციას ამყარებს სხვადასხვა ორგანიზაციებთან დეპარტამენტის უფროსის დავალებით;
- ე) დეპარტამენტის უფროსის დავალებით ასრულებს განყოფილების საქმიანობასთან დაკავშირებულ სხვა ფუნქციებს.

მუხლი 5. დეპარტამენტის სტრუქტურული ერთეულების ფუნქციები

5.1. კულტურის განყოფილების ფუნქციები:

- ა) უნივერსიტეტში კულტურული, შემოქმედებითი, სახელოვნებო საქმიანობა, საუნივერსიტეტო შემოქმედებითი მოღვაწეობის პოპულარიზაცია და განვითარება;
- ბ) ნიჭისა და სურვილის გათვალისწინებით სტუდენტებისა და პერსონალის შემოქმედებით საქმიანობაში ჩაბმა;
- გ) სტუდენტების ჰარმონიული განვითარებისა და სახელოვნებო სივრცეში მათი მოზიდვის მიზნით შესაბამისი შემოქმედებითი კონტაქტების დამყარება;
- დ) უნივერსიტეტის მულტიკულტურულგანვითარებაზე ზრუნვა და სტუდენტთა ყველა ეთნიკური ჯგუფის ჩართვა კულტურულ ღონისძიებებში;
- ე) საქართველოში ქართული ხალხური ფოლკლორის შენარჩუნებაზე, განმტკიცებასა და პოპულარიზაციაზე ზრუნვა;
- ვ) კულტურის სფეროში დასახული მიზნებისა და მიმართულებების შესაბამისად, აკადემიური და ადმინისტრაციული პერსონალის, სტუდენტების ჩართულობით კულტურული ღონისძიებების დაგეგმვა და ჩატარება;
- ზ) ინფორმაციული შეხვედრების ჩატარება და კულტურის დღეების დაგეგმვა;
- თ) პარტნიორული ურთიერთობების დამყარება კულტურის სხვადასხვა ცენტრებთან, შემოქმედებით ჯგუფებთან და კლუბებთან;
- ი) უნივერსიტეტის ფარგლებში კულტურის და ხელოვნების პრიორიტეტული დარგების გამოვლენა და მხარდაჭერა;
- კ) დებულებით განსაზღვრული მიზნების შესაბამისად საჭირო სხვა ღონისძიებების განხორციელება.

5.2. სპორტის განყოფილების ფუნქციები:

- ა) საუნივერსიტეტო სპორტის განვითარება, სპორტის პოპულარიზაცია, სპორტული ღონისძიებების, უნივერსიადების ორგანიზება სტუდენტ-ახალგაზრდობასა და თანამშრომლებში ცხოვრების ჯანსაღი წესის დასამკვიდრებლად;

- ბ) სპორტულ ღონისძიებებში სტუდენტ-სპორტსმენთა მოზიდვა და ნიჭიერი სტუდენტების გამოვლენა, მათთვის ხელშეწყობა მსოფლიო და ქვეყნის მასშტაბით უნივერსიტეტის სახელით უნივერსიადებში მონაწილეობის მისაღებად;
- გ) გამაჯანსაღებელი და სპორტული ღონისძიებების მომზადება;
- დ) უნივერსიტეტისათვის პრიორიტეტული სპორტის სახეობების გამოვლენა და მათი ხელშეწყობა;
- ე) აკადემიური და ადმინისტრაციული პერსონალის, სტუდენტების ჩართულობით სპორტული ღონისძიებების დაგეგმვა;
- ვ) ინფორმაციული შეხვედრებისა და სპორტული ღონისძიებების ჩატარება;
- ზ) პარტნიორული ურთიერთობების დამყარება სხვადასხვა სპორტულ ცენტრებთან და კლუბებთან;
- თ) უნივერსიტეტში არსებული სპორტის ინფრასტრუქტურის და ინვენტარის მოწესრიგება, სარგებლობა და ზრუნვა;
- ი) დებულებით განსაზღვრული მიზნების შესაბამისად საჭირო სხვა ღონისძიებების განხორციელება.

მუხლი 6. დასკვნითი დებულებები

- 6.1. დებულება ძალაშია უნივერსიტეტის წარმომადგენლობითი საბჭოს (სენატის) მიერ მისი დამტკიცების მომენტიდან.
- 6.2. დებულება ძალადაკარგულად ითვლება ახალი დებულების დამტკიცების ან/და დეპარტამენტის ლიკვიდაციის შემთხვევაში.